



## **Messadi davart la radunanza communal digls 9 d'otgover 2015**

Stimadas votantas, stimos votants

Suandontamaintg az infurmainsa davart dallas tractandas tgi vignan discutadas e deliberadas a caschung dalla radunanza communal digls 9 d'otgover 2015.

### **Protocol dalla radunanza communal digls 24 da zarcladour 2015**

Digl protocol ò savia neir piglia invista u tg'el ò savia neir retratg digls 10 da fanadour 2015 anfignen igls 8 d'avost 2015, durant 30 deis an canzleia communal. Ainfer igl termin d'exposiziun èn inoltradas nignas protestas. Igl protocol vign damai declero per approvo e vign sotsignia digl mastral e digl protocollist.

### **Lescha davart igl dretg da burghes digl cumeegn Albula/Alvra**

Chella lescha regla la procedura da natiralisaziun tenor igl dretg da burghes cantunal. Schi exista nign cumeegn da burghes, adamplescha igl cumeegn politic las sias incumbensas (art. 78 alinea 3 dalla lescha da cumeegns). La lescha davart igls dretgs da burghes digl cumeegn d'Albula/Alvra sa basa alla lescha da moster digl Uffezi da migraziun e dretg civil digl cantun Grischun pertutgont la regulaziun digl dretg da burghes sen plang communal. Tenor chella lescha ò la suprastanza la cumpetenzza da decider davart dalla natiralisaziun, siva tgi ena cumischung eligeida antras la suprastanza communal ò examino las preteisas formalas e sottamess ena proposta correspondententa. Per decisiuns ainten la procedura da natiralisaziun vignan incassadas taxas tgi corvan igls costs, applitgond la legislaziun cantunala. La suprastanza communal relascha ena regulaziun correspondententa. La lescha davart igl dretg da burghes preschainta è neida preexaminada digl uffezi per migraziun e dretg civil digl cantun Grischun.

### **Reglamaint da taxas davart la lescha da dretg da burghes digl cumeegn d'Albula/Alvra - infurmaziun**

Igl reglamaint da taxas davart la lescha da dretg da burghes digl cumeegn d'Albula/Alvra regla la tariffa dallas taxas per decisiuns davart la procedura da natiralisaziun. La taxa per la recepziun da burghes e burghesas svizras an dretg da burghes communal monta maximal 1'000.00 fr., per burghes digl exterior maximal 2'000.00 fr. La taxa ò da neir paeda er per cass:

- d'ena negaziun digl dretg da burghes;
- d'ena negaziun dalla lubientscha da natiralisaziun cantunala u federala;
- d'ena negaziun digl dretg da burghes cantunal;
- per cass tgi la dumonda vign scretga giu perveia d'ena retratga.

La lescha davart igl dretg da burghes è neida preexaminada digl Uffezi per migraziun e dretg civil digl cantun Grischun.

### **Statuts dalla basa da pumpiers Albula**

A fundamaint dalla fusiun communal Albula/Alvra s'impona la revisiun digls statuts dalla basa da pumpiers Albula. Igls cumegns politics Albula/Alvra, Tavo-Tagn e Farrera furman da nov l'associaziun da scopo. Fegnameira dall'organisaziun è l'execuziun da tottas lavours ed incumbensas, tgi sottastattan agls pumpiers. Igls cumegns mantignan lour legislaziun cun l'adattar allas structuradas dall'associaziun. Igls organs dalla basa da pumpiers Albula èn:

- la radunanza communal, schinavant tgi igls affars èn betg an cumpetenzza dalla suprastanza communal respectiva;
- la suprastanza dall'associaziun (1 commember per mintga cumegn dall'associaziun);
- la cumischung da gestiun.

Igls statuts novs von an vigour cun l'approvaziun antras la radunanza communal e siva dall'approvaziun antras la regenza digl cantun Grischun retroactiv sen igl 1. da schaner 2015 e ramplazzan igls statuts d'anfignen adacò.

### **Statuts Regiun Albula**

Igl onn 2012 ò igl pievel grischun approvo la revisiun parziala dalla constituziun cantunala, per simplifitgier igl schinumno plang masang aint igl cantun. Cotras èn neidas stgaffeidas endesch regiuns, tgi dissolvan igls 39 circuits, las 14 associaziuns regionalas ed igls 11 districts. Igls cumegns dalla regiun on peda anfignen la fegn digl 2015, da preparar l'abilitad d'ager dalla regiun. Lotiers appartignan tranter oter igl relascher igls statuts. Igls statuts dalla regiun Albula sa basan agls statuts da moster digl Uffezi da cumegns cantunal ed èn nias preexaminos da tal. Tenor igl dretg cantunal èn las regiuns responsablas per igls suandonts sectours:

Svilup territorial (planisaziun directiva regionala), dretg da protecziun per unfants e carschias (assistenza professiunala), fatgs digl stadi civil (uffezi civil) fatgs da scussiun e concurs (uffezi da scussiun e concurs) administraziun digls archivs circuitals tenor art. 3 dalla lescha da repartiziun cantunala ed ulteriouras incumbensas sagond la legislaziun cantunala correspondententa. Igl gremi transitoric, tgi consista dalla conferenza da tot las mastralas e mastrals dalla regiun correspondententa, az propona, d'approvar igls statuts dalla Regiun Albula an sia furma preschainta.

La suprastanza digl  
cumegn d'Albula/Alvra